

Jasna Duraković
Zastupnica SBB u Skupštini KS

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO
n/r Vlade KS; n/r Ministarstva zdravstva KS

Sarajevo, 14.05.2019

ZASTUPNIČKA INICIJATIVA

Upućujem Inicijativu za izmjenu Zakona o zdravstvenom osiguranju - Pravilnika o postupku i kriterijumima o privremenoj spriječenosti za rad zbog povrede, bolesti ili druge spriječenosti za rad.

Tražim da se kroz navedenu inicijativu predloži izmjena Zakona o zdravstvenom osiguranju - Pravilnika o postupku i kriterijumima o privremenoj spriječenosti za rad zbog povrede, bolesti ili druge spriječenosti za rad, (u daljem tekstu: Pravilnik), **tačnije Člana 17. Pravilnika a koji se odnosi na dužinu spriječenosti za rad za staratelje djece do 18 godina a koji se liječe od malignih bolesti.**

Obrazloženje:

Navedena inicijativa je odraz apela mnogobrojnih roditelja KS čija djeca su oboljela od malignih bolesti, i koji su u postupku procesa liječenja djeteta spriječeni na rad jer su potrebni svom djetetu.

Za navednu inicijativu javila nam se građanka, majka šestogodišnje djevojčice, te u obrazloženju navodimo njeno pismo.

Prema važećem Pravilniku, dužina trajanja spriječenosti za rad roditelja čije dijete se liječi od maligne bolesti je 6 mjeseci u jednoj kalendarskoj godini.

U slučaju dosta roditelja kod čije djece je dijagnosticiran malignitet, Akutna limfocitna leukemija, samo kliničko liječenje traje od 6-8 mjeseci, nakon čega je dijete u remisiji i predstoji 18 mjeseci održavanja postojećeg stanja tokom kojeg dijete i dalje dobija citostatsku terapiju oralno, ima kontrolu krvnih nalaza jednom sedmično. Tokom tih 18 mjeseci održavanja, dijete je imunokompromitovano, te nije sposobno biti dio bilo kakvog kolektiva, ima posebnu ishranu i praćenje stanja bolesti, ima mjesečne kontrole na klinici tokom kojih se rade sternalne i lumbalne punkcije. Djetetu je nakon dijagnoze bolesti ugrađen centralni venski kateter u glavnu srčanu venu, o kome u toku održavanja brigu vodi roditelj (ispira sterilnim postupkom, mijenja, vodi brigu da se ne povrijedi...).

Pored narušenog psihofizičkog stanja i djeteta i roditelja, nužno je prisustvo jednog od roditelja tokom trajanja liječenja i održavanja bolesti, kako bi se mukotrpan put koji je doveo do remisije bolesti očuvao kao i psihofizičko stanje djeteta koje nije moguće ostaviti nekom drugom na čuvanje, a bitno je imati zakonsku potporu, mogućnost odsustva sa posla tokom liječenja i rehabilitacije, kako roditelj/i ne bi ostali bez zaposlenja u situaciji kada su finansije itekako bitne. Ovim putem Vas molim, da pokušate po hitnom postupku izvršiti izmjenu zakona (pravilnika), na način da dok traje liječenje i održavanje bolesnog djeteta jedan od roditelja ima pravo na

privremenu sprječenost za rad, koju će odobriti prvostepena ili drugostepena ljekarska komisija, jer je bolest izlječiva u velikom postotku, ali postupak liječenja traje, zahtjeva praćenje, kontrolu i brigu o djetetu.

Kao što su to uradile zemlje u susjedstvu, izmjena Pravilnika bi podrazumijevala da roditelj ima pravo na bolovanje radi njege djeteta oboljelog od maligne bolesti neograničeno, tj. onoliko koliko traje liječenje i rehabilitacija kao i da će se roditelju osiguraniku koji ostvaruje kod poslodavca pravo na naknadu plaćena osnovu ove sprječenosti za rad isplaćivati puni iznos plaće.

Prisustvo roditelja za sve vrijeme liječenja djeteta i materijalna sigurnost porodice jedni su od najvažnijih uslova da bi proces liječenja tekao mirno i bio uspješan. Na ovaj način bi sistem i država stali iza onih kojima je potrebna podrška obezbjeđujući im neophodnu sigurnost i mogućnost brige o porodici onda kada je život djeteta ugrožen.

Iskreno se nadam da ćete prihvatiti i uzeti u razmatranje ovu inicijativu, na način da kroz izmjenu pravilnika date mogućnost osiguranicima (roditeljima djece koja boluju od malignih bolesti) da ostvare pravo na duže odsustvovanje sa posla neograničeno, tj. onoliko koliko traje liječenje i rehabilitacija kao i da će se roditelju osiguraniku koji ostvaruje kod poslodavca pravo na naknadu plaće na osnovu ove sprječenosti za rad isplaćivati puni iznos plaće, čime bi se svim tim roditeljima pružila prilika da budu uz svoju djecu, pružajući im bezrezervnu i potrebnu podršku dok vode najtežu bitku u životu, a u nadi da će ista u konačnici rezultirati ozdravljenjem.